



Inatsisartunut ilaasortaq Nikolaj Jeremiassen, Siumut
Inatsisartut
/MAANI

Qalerallit aamma atuisut ilisimasaat pillugit § 37 atorlugu nr. 2013-205-imut akissuteqaat

22-10-2013
Suliap nr. 2013-091053
Dok. nr. 1368723

Inatsisartut suleriaasianni § 37 imm. 1 naapertorlugu qalerallinnik aalisarneq aamma atuisut ilisimasaasa akulerutsinneqartarnissaat pillugit apeqquteqarsimavutit. Apeqqutit uannut akisassanngorlugit innersuutigineqarsimapput.

Postboks 269
3900 Nuuk

Tlf. (+299) 34 50 00

Fax (+299) 34 63 55

E-mail: apnn@nanoq.gl

www.naalakkersuisut.gl

Apeqqut:

1. Aalisarnikkut ilisimatuut naligalugit aalisartut ilisimasaasa atortinneqarnissaat qaqugu atuutilissasoq naatsorsuutigineqarpa?
2. Aalisartut umiatsiaararsortut ikiliseqqinnissaat Naalakkersuisunit anguniarneqarpa?
3. Aasiaat avataani Killiit qanittuanni basislinieq iluanut apakaattarluni qalorsuarsorluni qalerallinniarneq Naalakkersuisunit ilisimaneqarpa?

Akissutit:

1-imut): Aallarniutigalugu erseqqissaatigerusuppara, aalisartut ilisimasaat assorujusuaq pingaaruteqartutut isigigakkitt Kalaallit Nunaanni aalisarnermi pisuussutiisinnik aqutsiviginninnermut tunngatillugu. Aalisartullu ilisimasaat atorineqartareerput pisanik nalunaarutiginnittarneq aqutitigalugu aamma paasissutissannik allannik biologinik atorineqartartunik uumassuseqarnikkut siunnersuinnermut tunngavigineqartartup ilaatut. Aammattaaq aalisartut kattuffitsik aqutitigalugu Aalisarneq pillugu Siunnersuisoqatigiinni sinniisuutitaqarput. Taamaasilluni matumani aamma periarfissaqareerpoq isummat assigiinngitsut aalisartunillu kissaatigisaasut akulerutsinnissaannut, tamakku ilaatigut misilittakkaminnit tunngaveqartut. 2014-imi Upernaakkut ataatsimiinnissami Naalakkersuisut pilersaaruteqarput aalisarneq pillugu inatsimmut allannguutissatut siunnersuuteqassallutik, aalisartut atuisutut ilisimasaasa atortinneqalernissaat pillugu.

2-mut): Ajuusaarnaraluartumik naluneqanngilaq, umiatsiaaqqat amerlassusiisa aamma pisassiissutit sinerissamut qanittumi qalerallinniarnermi atorineqarsinnaasut akornanni pissutsit imminnut naapertuutingimmata. Sinerissamut qanittumi sumiiffinni pisassiissuteqarfiusuni aalisarnermi pisaqarsinnaassuseqarneq annertuallaarujussuarpoq, taamaattumillu takujuartarparput, pisassiissutit ukiumi siusissukkut tamakkerlugit aalisarneqartarnerat. Pisaqarsinnaassuseqarnerup suli qaffassinnaanera illuatungilerniarlugu aallaavittut aalisqaataasunut nutaanut sinerissamut qanittumi umiatsiaararsorluni qalerallinniarluni aalisarnermut ilaalersinnaasunut mattussusisoqarnikuuvoq. Taamaasiornikkut Naalakkersuisunit kissaatigineqarpoq, nalinginnaasumik aalisarunnaartarnikkut aalisartoqarpallaanera annikillisinnaassasoq. Soorlu siusinnerusukkut nalunaaruteqareernittut ilisimatitsissutigisinnavaara, Naalakkersuisut suliniummik inuusuttut piukkunnaatillit pillugit qaleraleqarfinni killilersuiffiusuni aalisartutut inuusutissarsiuuteqalernissamut aaqqiissuteqarusukkatta. Isumaliuutit taakkua ilaatigut ullumikkut 2014-imi aalisarnerup aaqqiissuteqqinneqarnissaanut suliniutinut pilersaaruteqarnermut ilanngun-

neqareerput. Oqaatigineqareersutut aammaarlunga aalisartunut tunisassiortunullu kaammattuutigissavara qaleralinnaanngitsunik aalisakkanilli allanik tunisisoqarsinnaananut periarfissat isiginiaqqullugit. Ilaatigut suleqatigiisitamik pilersitsisoqarsimavoq siunissami pisasseeriaatsimut periusissanik suliaqartussamik, pingaartumik umiatsiaararsorluni aalisartunut ullumikkumut suli unamminartunik kinguneqartitsisumik aalisartoqarneranik isiginninniartussamik. Suleqatigiisitap innersuussutissaai Naalakkersuisut utaqqimaarpaat.

3-mut) Nalunaarutigisinnaavara, ilisimasaqarfiginnginnakku, sumiiffimmi pineqartumi apeqqutinni taasanni qalorsuit atorlugit qaleralinnik aalisartoqarnera. Tassunga atatilugu KANUAANA saaffiginnissuteqarfigisimavara. Tassani akissutigineqarpoq, pissutsit eqqaasatit ilisimasaqarfigineqanngitsut. Sumiiffimmi kisiartaalluni qalorsuarsorluni aalisarneq takuneqarsimasoq tassaavoq raajarniarluni aalisartoq, tamannalu inatsisigut unioqqutitsinerunngilaq. Inatsisunik unioqqutitsinernik nalaassisoqarsimassappat sak-kortunerpaamik ilinnut tutsuiginartoq ilisimatitsisuusimasoq kaammattussavara saqqummiusseqqullugu pissutsillu pillugit unnerluunneqarnissamik nalunaaruteqaqqullugu.

Inussiarnersumik inuulluaqqusillunga.

Karl Lyberth